



DEO OPTIMO MAX.

UNI ET TRINO,

VIRGINI DEI - PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
*manè discutienda, in Scholis Medicorum, die Jovis decimo. quarto
mensis Januarii, anno Domini M. DCC. LI.*

M. CLAUDIO - FRANCISCO GRANDCLAS;
STANISLAÏ Poloniarum Regis, Lotharingiæ & Barri
Ducis Consiliario & Medico, Doctore Medico, Præside.

An ex poris potius quàm ex vasorum extremitatibus transpiratio?

I.



I quid certi in Scholis Philosophorum habetur, corporum porositas. Varia duntaxat pororum amplitudo diù controversa. Quidam solidorum poros soli menti permeabiles voluerunt; hinc Medici nonnulli fabricatum à primo creationis instanti contextum vasorum eum sibi finxerunt, qui nullis admissis poris, nullius fluidi avolationem permitteret. Vetus error! evanuit, & laus tanta Physicæ experimentalis referenda. Compertum solidissima quæque corpora, putà vitrum, marmor (a), aurum (b), & ferrum (c) non

A

(a) Mém. de l'Acad. 1670.

(b) Phys. du P. Renault sur la porosité des Corps.

(c) Boyle, nov. experim. Phys. mechan.

quidem fictitiis; nec immensè angustis, verùm amplis & latè satis hiantibus poris esse instructa. Undè analogica palàm fit vegetabilium & animalium porositas. In his autem corporibus lati sat extant pori, ut liquida quæcumque valeant transmittere. Id attestantur clarissimi Boyli & Mussebroekii experimenta, in quibus enumerandis dum superledemus, juvat in medium asserre vesicæ fellæ exemplum quo constat partes biliosas in hoc promptuario contentas per poros tunicarum jugiter transsudare, adeò ut pars arcus coli vicina gustu & visu bilem referat. Itaque cùm solidorum pori sint in ratione inversâ partium integrantium densitatis, sequitur quòd in variis corporibus varia sit illorum diameter; sic minor in densissimis, solamque aëris partem tenuissimam admittere potis; major econtrà in laxioribus quæ faciliè variis fluidis aditum præbent.

I I.

NEQUE aliam ob causam præter porositatem tanta sui detrimenta patiuntur corpora. Fluidis enim assiduè in his motis, assiduus fit in omnibus serè punctis affrictus, attritio consequenter & abrasio partium minimarum quæ sui juris factæ, unà cum vehiculo varios pervagantes meandros datâ quoquo vesum portâ, avolant. Hinc omnium ineluctabile fatum, successiva corporum dissolutio. Hæc tamen notandum quòd varia sit corporum deperditio, prout varia in unoquoque observatur densitas & partium partibus adhæsiō. Mineralia quæ densior protegit compages partium aliundè merè solidarum sic à naturâ sibi fuisse consultum gaudent ut, cùm exhalationum damna refarcire nequeant, parciolem sui patiantur jacturam. Quoniam verò vegetabilia eâ donantur organicâ structurâ ut nec generari, nec crescere, nec vivere possint quin maximam in se suscipiant fluidorum quantitatem, uberrimam in illis fieri perspirationem necesse est; sed partium præsertim fluidarum: cùm enim ad nativum fluiditatis motum novus insuper ab impulsione circulatoriâ communicatus accedat, partes illas dum tranant canales undique per poros laterum meabiles, partim transsudare, foràs elabi, ac evanescere hydraulice leges postulant. Hinc tam portentosa (a) aquarum copia quotannis in suctione plantarum absumitur. Neque id mirum cùm fuerit observatum à *Francisco Delanis* partem singulis diebus ex unaquâque plantâ exhalatam tertiam illius ponderis partem adæquare. Jam verò quanta sit vegetabilium inter & animalium vivendi modum analogia, Medicus nemo nescit. Utraque porositas constanter tubis, requirunt utraque fluidum quod prædictos repleat tubos, & intus moveatur; ergò & utraque deperditionis per poros haud mediocris manet necessitas eadem ac ratio, ut jam dicendum.

I I I.

SOLA fluidorum & solidorum actione reciproca vivit homo, cæteraque vivunt animalia. Vasa autem corporis omnia sivè in diastole sivè in systole versentur, quamdam semper experiri dilatationem Physiologum nullum laet; sed ita ut in systole minor sit, & respectu majoris quæ sit in diastole quasi contractio habeatur, licet reverà sit dilatatio. Ilæc porrò statum indicat violentum quo semper laborantibus vasis, fibræ parietum à se invicem distant magis quàm vellet propria quietis suæ natura; undè pori vasorum parietibus insiti ultrò dilatantur & ampliantur. Præter autem fluidum è gemino cordis thalamo propulsum, nulla alia admittitur causa quæ vasis dilatationem præstare valeat: porrò istud fluidum omnem replet illorum cavitatem, adeò ut internæ superficiei nulla sint puncta physica quæ à fluido contento non contingantur. Itaque in dilatatione, dum in partes vasorum

(a) Spect.
de la Nat.
Tom. 3. pag.
237.

impelluntur fluidi particulae, aliae impetunt in solida fibrarum puncta, aliae in puncta vacuolorum fibras inter omnes interjectorum: illae pro motu suo ab axi ad circumferentiam fibras pellunt, hae verò poros ingrediuntur per quos foras elabi necessum. Dilatationem excipit contractio. Quanta vi parietes vasorum ab axi canalisi ad circumferentiam propulsi fluidum, tanta nunc ab eisdem repellitur. Cum verò, consequenter ad idem spatium in hac motus reciprocatione mensum, solida & vacua fibrarum puncta numero & amplitudine maneant eadem, & ab omnibus punctis cingatur fluidum; sequitur juxta leges hydraulicas quòd per totum vitae curriculum, dilatationibus vasorum & contractionibus perenniter vigentibus, futurum sit necessàriò per poros minutissimarum fluidi particularum perenne effluvium. Hinc partes corporis omnes jugiter irrorantur perspiratoriâ hâc pluvîa ex omnium poris vasorum stillante. Hinc apertis capite, thorace, & abdomine in vivis animalibus, protinus elevatur fumus quidam unctuosus & carnem redolens qui in vitro collectus naturam sudoris adaequat. Nec conceptu arduum quâ viâ humorum hâc colluvia è corpore foras eliminentur. Quippequi is est corporis calor qui in intimioribus major, minor in extimioribus existit; calor autem est motus expansivus quo quaecumque partes donatae aufugere semper nituntur: prout itaque ex omnibus vasorum poris depluunt ubique tenuissimæ effluviolum particulae inundant varias locorum differentias, huc & illuc per varios partium meandros divagantur. Neque hic subsistere fas est: statim enim à calore loci novum accipitur motus gradum quo expansæ quoquoersum effugere tentant; hinc fumi adinstar exhalati ambientium membranarum poros transmeare, varias percurrere vasorum, nervorum, ipsarummet fibrarum juxta positiones, omnes inter irrepere duras mollesve partes; sicque magis ac magis, lento licet gradu à centro ad peripheriam corporis evehi. Hic autem cutis adest, novus agger. Quid inde? Obvia mille patent viæ; cutis subeunt poros, superat & hoc labore tandem æthera petunt. Hoc tamen notandum quòd varia sit prædicta in auras exhalatio habitâ ratione cum ad variam cutis naturalem texturam, tum ad varias impressiones aeris calidioris modò, modò frigidioris. Contractâ cute tardius, laxatâ citius evolant perspirantia. Hinc Hippocrates: *cutis densitas, alvi laxitas; cutis raritas, alvi restrictio.* (a)

(a) Hippocri-
epid. VI. Sect.
III.

I V.

FUTILIS ergò hæc glandularum cutanearum hypothesis, cui faventes quàm plurimi transpirationem contendunt esse veram secretionem, & humorum depurationem quæ in prædictis organis facta, dein per vasa excretoria in auras elabatur. Quidam velut si quid esset discriminis sudorem inter & perspirationem, glandulas cutaneas pro peculiari sudoris fonte habuerunt. Recentiores nonnulli neglectis glandulis transpirationis causam referunt vasorum capillarum extremitatibus quæ cuti appensæ humorem continuò affluentem exhalant. Quid porro ad hæc organa recurrendum, cum absolute & essentialiter admittendum fluidi per vasorum poros effluvium & quidem uberimum tam mechanicam quàm hydraulicam leges demonstrent? Nil itaque nos movet quidquid protulerint de variâ perspirationis causâ & origine; una est evidens æquè ac certa, pendens ab essentiali corporis porositate. Quæ eò nobis acceptior est notio, quòd, præter miram hanc simplicitatem quâ tam perfectè consonant genio naturæ, insuper ex illâ, tanquam è præmissis conclusio, explicata manent cætera quæ observantur phenomena. Attendatur enim ad hæc Theos principia: porosi sunt vasorum parietes; consequenter assiduus fit fluidi effluxus qui compressione adaugetur; perspirans humor calore ex-

(a) Sanctior.
sect. 5. Aph.
9.
(b) Idem.
sect. 5. Aph.
34.
(c) Idem.
sect. 2. Aph.
2.

panditur, ad exteriora elevatur; per cutem citius ocius transfudat. Patebit unicuique cur (a) exercitio corpora leviora fiunt, (b) Ubi perspiratio in sanis deficit, exercitio sarcitur, (c) Aer calidus & lavacra aëni calida corpora efficiunt leviora. Patebit & ratio diversæ perspirationis quam experti sunt in Italiâ Sanctiorius, in Galliâ Dodart, Keil in Angliâ.

V.

SUPEREST circa cutis poros lis dirimenda. His lubenter assentimur qui plurima suprà cutem inhiare vasa contendunt: qui verò objiciunt cutis poros nil quidpiam aliud esse præter orificia extremitatum capillarum cuti appensa, horum sic invictè opinionem refellimus. Detrahatur cutis humana, & exsiccetur aded ut diffatis fluidis omnia oblitterent vasa & cavitates penitus exolescant; nihilominus si intus includitur hydrargirus, per pressionem sic exprimitur ut nullum indè cutis punctum magis coloratum appareat. Præparata sic & exsiccata hædorum, agnorum, & ovium coria, si magno sat intervallo exponantur orificio phialæ fumigante spirituoso liquore adimpletæ, statim abundèque penetrantur ab emanantibus effluviis quæ indè in auras avolant. Quæ sanè experimenta pro cutis poris nullatenus arguunt vasorum canales, si quidem jam oblitteratis vasis, cavitates penitus evanuerant. Habenda itaque corporis cutis ut testa & subjacens cuticula ovorum, quæ densior licet, perpetuam fluidi contenti per poros avolationem permittit. Quod graphicè sic expressit Sanctiorius: (a) perspiratio insensibilis fit per poros corporis quod est totum transpirabile, & cutem tanquam nassam circumpositam habet. Et hoc satis fit quòd certissima tam hydraulicarum quàm mechanicarum rerum principia, corporum analogia, nostri ipsiusmet corporis natura, experientiæ & phenomena unanimi voce conclament, quod nobis concludendum.

(a) sect. 1.
Aph. V.

Ergò ex poris potius quàm ex vasorum extremitatibus transpiratio.

DOMINI DOCTORES DISPUTATURI.

M. Antonius le Camus.

M. Petrus Chevalier.

M. Hyacinthus - Theodorus
Bayon, Antiquus Facultatis
Decanus.

M. Claudius Bourdier de la
Mouliere.

M. Franciscus Bernard.

M. Joannes - Franciscus Cou-
thier.

M. Petrus Arcelin.

M. Joannes le Thieullier,
Chirurgia Gallico Idiomate
Professor designatus.

M. Michael-Procope Couteaux;
Bibliotheca Facultatis Præ-
fatus.

Proponēbat Parisiis, JOANNES-BAPTISTA BARJOLLE, Salmuriensis;
Doctor Medicus Montpelienſis, Saluberrimæ Facultatis Medicinæ
Parisienſis Baccalaureus, A. R. S. H. 1751,
A SEXTA AD MERIDIEM.